



**Uunga siunnersuut: Nalunaaquttap aalajangersarneqarnera pillugu Inatsisartut inatsisaat.**

(Naalakkersuisut Siulittaasuat)

(Siullermeerneqarnera)

Nalunaaquttap aalajangersarneqarnera pillugu Naalakkersuisut siunnersuutaannut qujanaq.

Demokraatit iluarisimaarpaat, uagut Kalaallit Nunaanni uuminnga siunnersuuteqartoqarnerani nammineerluta nalunaaquttap ingerlaqatigiiffiini sumiissanerluta kissaatigisarput nammineq aalajangersinnaalissagatsigu.

Siunnersuut isikkumigut kusanaannangilaq, tassami kingunerisussaagamiuk, nunap annersaani nalunaaquttap nikisinneqarnissaa imaasillugu, Danmarkimut Europallu annersaanut nalunaaquttap nikinganera 3 tiiminngussammat fire tiimiunani, sungiusimasatsit.

Tusarniaanermi Air Greenland akissuteqarnermini nalunaarpoq, piffissap assigiinngissutaata Kalaallit Nunaata Danmarkillu akornanni Air Greenlandimut allanullu timmisartuusseqatigiinnut, Kalaallit Nunaannut Kalaallit Nunaanniillu sulliserusuttunut, pitsaasumik kinguneqassasoq. Tamanna annermik pingaaruteqarpoq Nuummi Ilulissanilu mittarfissuassat timmisartuusviginneqarnissaanni silaannakkut angallassisartunik pilerisaarinissamut.

Demokraatit neriuutigisimagualuarpaat, siunnersuummut uunga atatillugu aasaanerani nalunaaquttap nikisittarnerata peerneqarnissaa, tunngavilersuulli paasilluarsinnaavarput, silatusaarnerusoq taamaaliornissaq EU-mi nunat nikisitsisarnerup peerneqarnissaanni pissappat.

Naggataatigullu isumaqarpugut, oqallisissatsialaasoq, qanoq ililluta nuna tamakkerlugu assigiimmik nalunaaqutaqalersinnaanissarput. Tamanna ataatsimiititaliap suliniarnissaani sukumiisumik misissorneqartariaqarpoq. Iluaqutaasorujussuussagualuarpoq isumaqatigiissutigigaanni uuma siunnersuutip isummerfiginissaanut atasumik taamaalioraanni, qanittumi inatsit allanngorteqqinnginniassagatsigu.

Siunnersuut taamatut oqaaseqasatilerlugu akuereqqullugu innersuupparput ataatsimiititaliamilu susasaqartumi suliareqqitassanngorlugu.